

(UKA 2015/120)

**Aningaasaateqarfimmi aningaasat katersat ileqqaakkallu erniaat taamaallaat ator-
neqarsinnaaneri siunertaralugu Aatsitassarsiornermi Aningaasaateqarfik pillugu
Inatsisartut inatsisaannut nr. 6, 5. december 2008-meersumut allannguutissamik
saqummiussinissaannik Naalakkersuisut peqquneqarnissaannut Inatsisartut aala-
jangiiffigisassaattut siunnersuut**

(Inatsisartunut ilaasortaq Naaja Nathanielsen, Inuit Ataqatigiit)

aamma

(UKA 2015/121)

**Kalaallit Nunaata Aatsitassarsiornermi Aningaasaateqarfia pillugu Inatsisartut
inatsisaata nr. 6, 5. december 2008-meersup allanngortinneqarnissaanut Naalak-
kersuisut peqquneqarnissaannut Inatsisartut aalajangiiffigisassaattut siunnersuut,
imaalillugu Inatsisartut ukiut tulleriissut aappassaanni nunatta karsiata
naatsorsuutaanik aatsaat akuersereeraangata aningaasaateqarfik aallartin-
neqartassasoq, aatsaallu ukiumi naatsorsuiffiusumi aatsitassanit isertitat 10 millioner
kroninit annertunerusimappata. Inatsisartut inatsisaat ukiup tullissaani 1. januarimi
atuutilissaaq imaluunniit Naalakkersuisut aalajangiippata siusinnerusukkut. 10
millioner kronit taaneqartut Inatsisartut ukiumi pineqartumi Aningaasaqarnermut
inatsisaat naapertorlugu ataatsimut isigalugu akit akissarsiallu nalingannut
naleqqussarneqartassapput**

(Inatsisartunut ilaasortaq Naaja H. Nathanielsen, Inuit Ataqatigiit)

aamma

(UKA 2015/122)

**Kalaallit Nunaata Aatsitassarsiornermi Aningaasaateqarfia pillugu Inatsisartut
inatsisaata nr. 6, 5. december 2008-meersup allanngortinneqarnissaanut kingusin-
nerpaamik UPA2016-imi Naalakkersuisut peqquneqarnissaannut Inatsisartut
aalajangiiffigisassaattut siunnersuut, imaalillugu Kalaallit Nunaata Aatsitas-
sarsiornermi Aningaasaateqarfia pillugu Inatsisartut inatsisaanni aatsitassarsiornermit
isertitanut paasinninnera Namminersorneq pillugu inatsimmi aatsitassarsiornermit
isertitanut paasinninnermit immikkoortinneqassasoq. Allannguinermit tigussaasumik
atortut, soorlu oliamik maqisuunnginnissamut atortut, illuutit sanaartukkalluunniit
allat atortullu Kalaallit Nunaata Aatsitassarsiornermi Aningaasaateqarfiani
aatsitassarsiornermit isertitatut naatsorsuutigineqannginnissaat allanneqartariaqarpoq**

(Inatsisartunut ilaasortaq Naaja H. Nathanielsen, Inuit Ataqatigiit)

pillugit**Aningaasaqarnermut Akileraartarnermullu Ataatsimiititaliap****ISUMALIUTISSIISSUTAA****Siunnersuutit appaassaancerneqarneranni saqqummiunneqartoq**

Aningaasaqarnermut Akileraartarnermullu Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Jens Immanuelson (Siumut) siulittaasoq

Inatsisartunut ilaasortaq Steen Lyng (Atassut) siulittaasup tullia

Inatsisartunut ilaasortaq Jess Svane (Siumut)

Inatsisartunut ilaasortaq Tillie Martinussen (Demokraatit)

Inatsisartunut ilaasortaq Naaja H. Nathanielsen (Inuit Ataqatigiit)

Inatsisartunut ilaasortaq Sara Olsvig (Inuit Ataqatigiit)

Inatsisartunut ilaasortaq Peter Olsen (Inuit Ataqatigiit)

UPA 15-imi siullermeerinninnerup kingorna ataatsimiititaliap siunnersuutit misissorpai.

1. Siunnersuutit imarsiaat siunertaallu**1.1 (UKA 2015/120)**

Aatsitassarsiornikkut isertitaqarlualernej saniatigullu tassanga isertitat qanoq atorineqar-nissaat pillugu ersernerluttumik maleruagassiortoqarsimanagera inuiaqatigiinniit uniffiqineq-qunagu inatsimmi ersarissunik maleruagassiornissamik kissaateqarnini siunnersuuteqartup siunnersuumminut tunngavilersuutigaa. Aningaasaqarnermut Siunnersuisooqatigiit nalunaaru-siaat 2012-imi ukiakkut saqqummiunneqartoq siunnersuuteqartup innersuusutigaa, tassanimi allassimammam tamatuma kingunerisaanik aningaasat kukkusumik inissinneqarnissaannut aarlerinartoq annertunerarneqartoq. Taamaattumillu siunnersuuteqartup kissaatigaa inatsisiti-gut sukaterisoqassasoq aammalu Norgemi uuliamik aningaasaateqarfiup inatsisitigut toqqam-mavigisai qanillattorneqassasut.

1.2 (UKA 2015/121)

Taamanikkut Inuussutissarsiornermut Ataatsimiititaliap UKA 2012/52 pillugu isumaliutis-siissummini siunniussaata kissaataatalu naammassineqarnissaata anguneqarnissaanik kissaa-

teqarnini siunnersuuteqartup siunnersuumminut tunngavilersuutigaa. Qinersinissap nalunaarutigineqarnissaa sioqqullugu immikkoortoq naammassillugu suliarineqanngitsoorpoq. Taamaattumillu siunnersuuteqartup kissaatigaa Inatsisartut ukiut tulleriissut aappassaanni nunatta karsiata naatsorsuutaanik, ukiumi naatsorsuiffiusumi aatsitassanit isertitanit 10 millioner koruuninit amerlanerusunik imaqartunik, aatsaat akuersissutiginnereerpata Aatsitassarsiornermi Aningaasaateqarfik aallartinneqartassasoq.

1.3 (UKA 2015/122)

Siunnersuuteqartoq isumaqarpoq pigisat tigussaasut, soorlu timersortarfiit imaluunniit oliamik maqisuunnginnissamut atortut, tunngavigalugit Aatsitassarsiornermi Aningaasaateqarfiup aallartinneqarnissaa taamanikkut inatsisiliortut siunertarisimangikkaat. Siunnersuuteqartummi isumaa malillugu taakku aningaasanik immi isertitsiviunngillat aningaasaliissutitullu atorqeersinnaanatik. Tamatumalu saniatigut pigisat tigussaasut nalingat piffissap ingerlanerani appariartortarpoq aammalu atorsinnaassuseqassappata aningaasartuuteqartariaqarnermik nassataqarajuttarlutik.

Taamaattumik Kalaallit Nunaata Aatsitassarsiornermi Aningaasaateqarfiani isertitanik paasininnermik allannguuteqartitsinissaq, taamatullu pigisat tigussaasut isertitatut naatsorsuunneqannginnissaat aalajangiiffigisassatut siunnersuuteqarnermi siunertarineqarpoq.

2. Ataatsimiititaliap siunnersuutinik suliarinninnera

2.1 (UKA 2015/120)

Siunnersuutip piviusunngortinneqarnissaa Naalakkersuisut tunuarsimaarfigigaat Aningaasaqarnermut Akileraartarnermullu Ataatsimiititaliap aallarniutigalugu oqaatigissavaa. Aalajangiiffigisassatut siunnersuutip uuma piviusunngortinnissaanut ajornartorsiut una Naalakkersuisunit uniffigineqartoq ataatsimiititaliamit immikkut maluginiarneqarpoq:

”Aatsitassarsiornermi Aningaasaateqarfik pillugu inatsimmi § 7, imm. 2-imi allasimavoq, piffissaq aatsitassarsiornermit isertitat, tamatuma kingorna ataatsimoortumik tapiissutit annikillinerannik malitseqartussanngorlutik annertussuseqalernissaat sioqqullugu, aningaasaateqarfimmit tunniussisoqarsinnaanngitsoq. Taamatuttaaq § 7, imm. 2-imut nassuiaatini allasimavoq, naalagaaffiup ataatsimoortumik tapiissutaasa annikillinerisa sapinngisamik aningaasaateqarfimmit taamaaqataanik annertussusilimmik tunniussinermi illuatungilerneqarsinnaanissaasa qulakkeerneqarnissaa tamatumunnga siunertaasoq. Erniat annertussusaat apeqqutaatinnagu tamanna atuuppoq.”¹

¹ http://intra.ina.gl/dvd/EM2015/pdf/media/2636719/pkt120_121_122_fm2015_bf33_raastoffond_sn_1beh_dk.pdf

Aningaasaateqarfiliormi anguniakkat pingaernerit marluupput. Siullermik aatsitassarsiornermut tunngasuni iluanaarutit maanna kinguaariinnit piffissamut qanittumut isigisunut nungulussinnarneqannginnissaat. Aappaattut Kalaallit Nunaata aatsitassarsiornermit isertitai ima amerlatigilerpata ataatsimoortumik tapiissutit ikilineqarnerannik nassataqarlutik ataatsimoortumik tapiissutit ikilissutaannut taartissaqartitsinissaq. Matumani siunnersuutigineqartut aningaasaateqarfimmit tunniussisarnernut matumani siunnersuutigineqartut sukanganerumik periuseqarnissaq ajornartorsiummut naammattumik akissutaanersoq oqaluuserineqarsinnaavoq. Aatsitassarsiornermi Aningaasaateqarfimmit aningaasanik atuinissamut maleruagassat pillugit Aningaasaqarnermut Siunnersuisoqatigiit makku uparuarpaat:

”Aatsitassarsiornermi aningaasaateqarfinnut allanut naleqqiullugu naliliinermi kalaallit nunaanni aatsitassarsiornermi aningaasaateqarfik aningaasat atorneqarnissaat pillugu annertuunik erseqqinngitsunillu toqqammavinnik nassuiaasimavoq. Tamatuma kingunerisaanik aningaasat kukkusumik inissinneqarnissaannut aarlerinartooq annertuvoq. Kaammattuutigineqarpoq Aatsitassarsiornermi aningaasaateqarfimmi aningaasat atorneqarneri pillugit maleruagassat erseqqinnerusumik paasinannerusumillu oqaasertalerneqassasut, pingaartumik piviusumik iluanaarutit agguaqatigiissillugu qaffasissuseqartut avataaniittunik atuinermut naleqqiullugu.”²

Aalajangiiffigisassatut siunnersuut una piviusunngortinneqarpat piviusunngortinneqanngipalluunniit Aatsitassarsiornermi Aningaasaateqarfimmit tunniussinissamut tunngavissat siamasillutillu ersernerlunnerannik Aningaasaqarnermut Siunnersuisoqatigiit uparuagaat suli aaqqiivigineqartariaqarpoq. Ajornartorsiut taanna pillugu Aningaasaqarnermut Siunnersuisoqatigiit oqaatigisaat Naalakkersuisut akissuteqaamminni ilumoorneraraat ataatsimiititaliamit maluginiarneqarpoq. Tamanna pillugu Naalakkersuisut isumaat ataatsimiititaliamit pitsaasutut isigineqarpoq.

Aningaasaateqarfimmit tunniussinerit pillugit aalajangersakkat sukaterneqarnissaannik erseqqissarneqarnissaannillu imaqartumik Naalakkersuisut allannguutissatut siunnersuummik UKA 16-imi saqqummiussinissartik pilersaarutigigaat Aningaasaqarnermut Akileraartarnermullu Ataatsimiititaliamit maluginiarneqarpoq.

”Peqatigisaanik oqaatigisinnaavara aningaasaateqarfimmit aningaasat qanoq annertutigisut tiguneqarsinnaanersut maleruagassanik sukannernerulersitsinissamut siunnersuuteqarluni, kiisalu aningaasaateqarfiup aningaasaliisarfiinut allaffissornermullu politikkimut eqaannerusumut siunnersuuteqarluni, 2016-imi ukiaanerani

² <http://intra.ina.gl/media/16806/Okonomisk%20Ráds%20rapport%202012.pdf>

*ataatsimiinnissamut allannguutissatut siunnersuummik saqqummiussinissaq Naalakkersuisut naatsorsuutigimmassuk.*³

Tassunga atatillugu Naalakkersuisut ilaatigut Aningaasaqarnermut Siunnersuisoqatigiinnik oqaloqateqarnissaat Aningaasaqarnermut Akileraartarnermullu Ataatsimiititaliamit kaammattuutigineqassaaq, taamaaliornikkut aningaasaateqarfimmit tunniussisinaanissat aningaasaliinissamullu periarfissat eqaatsuunissaasa aammalu aningaasaqarnikkut ungasissumut isigaluni attanneqarsinnaasumik iliuuseqarnissap akornanni oqimaaqatigiissitsinissaq naleqquttoq anguniarlugu ajornanngippat oqaasertaliinissaq qulakkeerreqarsinnaaqqullugu. Nalilinnit nunatta ataaniittunit iluanaarutit ilaannik naleqquttumik annertussusilinnik kinguaariit aggersut aamma pissarsinissamut qulakkeerunneqarnissaat aningaasaateqarfiup maleruagassatigut tunngavigisaani naammattumik annertussusilinnik aamma ilanngunneqartariaqarpoq. Nagga-siullugu ataatsimiititaliamit naatsorsuutigineqarpoq Naalakkersuisut UKA 2016-imi allannguutissaatut siunnersuummik saqqummiussilersaarnerat kinguarsarneqassanngitsoq. Tamatumani minnerunngitsumik aatsitassarsiornermik suliniutit arlallit piariilernerat eqqarsaatigalugu, taamaalillunilu piffissap qaninnerup ingerlanerani aatsitassarsiornermit ingerlaavartumik isertitaqarnissaq ilimagineqarsinnaalluni.

2.2 (UKA 2015/121)

UKA 2012/52 pillugu isumaliutissiissut siuliani taaneqartoq ataatsimiititaliamit innersusutiginerpoq, tassani siunnersuummut matumunnga tunuliaqutaasoq sukumiisumik paasisitsisutiginerpoq. Isumaliutissiissut iserfissiaq una aqutigalugu pissarisarineqarsinnaavoq⁴. Taamani Inuussutissarsiornermut Ataatsimiititaliaasoq isumaqatigiittoq Aatsitarsiornermi Aningaasaateqarfik pillugu inatsimmut allannguutissatut siunnersuummik aalajangiiffigisassatut siunnersuutip matuma asserluinnangajaanik saqqummiussivoq. Taamani Inuussutissarsiornermut Ataatsimiititaliaasoq assigalugu Aningaasaqarnermut Akileraartarnermullu Ataatsimiititaliaq isumaqarpoq aatsitassarsiornermut tunngasuni ukiumi ataatsimi ataasiartumik isertitaqarsinnaaneq tunngavigalugu Aatsitassarsiornermi Aningaasaateqarfiup aallartinneqannginnissaa pingaaruteqartoq. Aatsitassarsiornermit isertitat aalaakkaasusariaqarput aningaasaateqarfik aallartinneqassappat.

Siunnersuutip matuma akuerineqarnissaa Naalakkersuisunit inassutigineqartoq ataatsimiititaliamit maluginiarneqarpoq. Tamatuma saniatigut Aatsitassarsiornermi Aningaasaateqarfik pillugu inatsimmut allannguutissatut siunnersuummik (UKA 2015/119) aalajangiiffigisassatut

³

http://intra.ina.gl/dvd/EM2015/pdf/media/2636719/pkt120_121_122_fm2015_bf33_raastoffond_sn_1beh_dk.pdf

⁴ http://www.ina.gl/media/655650/pkt52_em2012_fm12_raastoffond_rettblad_bet_2beh_dk.pdf

siunneersuutip matuma atortulersuutit eqqarsaatigalugit imarisaanik ersersitsisumik Naalakkersuisut saqqummiussimmata ataatsimiititaliamit oqaatigineqassaaq.

2.3 (UKA 2015/122)

Aatsitassarsiornermi Aningaasaateqarfimmut tunngatillugu pigisat tigussaasut naatsorsorneqartarnerat pillugu allannguutissatut siunnersuummik 2016-imi upernaakkut ataatsimiinnermi Naalakkersuisut saqqummiussilersaartut Aningaasaqarnermut Akileraartarnermullu Ataatsimiititaliamit maluginiarneqarpoq.

Ajornartorsiutip tamatuma naammaginartumik paasinarsisinneqarnissaa aalajangiisuusutut ataatsimiititaliamit isigineqarpoq. Tamatumani minnerunngitsumik aallaaviulluni taamani ajornartorsiutaaleraluartoq, tassalu uuliaarluernermi atortulersuutit Cairn Energymit 2012-imi tiguneqarnerat, Aatsitassarsiornermi Aningaasaateqarfiup maleruagassatigut tunngavigisai pissutigalugit, aningaasaateqarfiup aallartinneqarneranik kinguneqarsinnaanerat. Ajornartorsiut taanna pillugu isumaliutissiissummini (UKA 12/52) Inuussutissarsiornermut Ataatsimiititaliaq ilaatigut ima oqaaseqarpoq:

"Tamatuma saniatigut Ataatsimiititaliaq isumaqarpoq, aatsitassarsiornermi aningaasaateqarfimmut isertitaanut nassuiaatip atorineqartup, allanngortinnissaa pisariaqartoq. Aatsitassarsiornermi aningaasaateqarfimmut isertitassanut nassuiaatip Aatsitassanut inatsimmi atorineqartup assigisariaqanngikkaa Inuussutissarsiornermut Ataatsimiititaliaq isumaqarpoq. Aatsitassanut inatsimmi isertitassanut nassuiaat Namminersorneq pillugu inatsimmi allaaserineqartutut qallunaat naalagaaffiannut isumaqatigiissutitigut pituttorsimasuuvoq. Inatsisartulli akornutissaqanngitsumik aatsitassarsiornermi aningaasaateqarfik pillugu aalajangiisinnaapput."

aamma

"Tamanna tunngavigalugu ataatsimiititaliaq isumaqarpoq, taamaallaat (aatsitassarsiornermit) aningaasannorlugit isertitarineqartut kisimik aningaasaateqarfiup pigisaatut ilaatinneqartassasut. Isumaq tamanna Inuussutissarsiornermut Ataatsimiititaliaq siuliini majip 11-ani 2012-imi Naalakkersuisunut apeqquaqateqarnermini oqaatigereepaa. Naalakkersuisut majip 15-ani 2012-imi akissutiminni apeqquummut siullermut oqaatigaat, assersuutigalugu ilinnimiitaanermut aningaasaliissutaasartut aamma imaluunniit inuiaqatigiinnut tunngasutigut atorluanaanissamik siunertanut assigisaannulluunniit, aatsitassarsiornermik ingerlatseqatigiiffinnit Kalaallit Nunaanut akiliutitut aningaasaliissutit aamma isiginiarneqassasut. Taamaattut aamma iseliitarisassatut ilaatinneqartariaqanngildcaluarput. Tamanna isumalerujussuuvoq."⁵

⁵ http://intra.ina.gl/media/655650/pkt52_em2012_fm12_raastoffond_rettblad_bet_2beh_dk.pdf

Taamani Inuussutissarsiornermut Ataatsimiititaliaasup isumaliutissiissutaa Aningaasaqarnermut Akileraartarnermullu Ataatsimiititaliamit tusaatissatut tiguneqarpoq. Aningaasaqarnermut Akileraartarnermullu Ataatsimiititaliap oqaluuserisassani immikkoortoq 85 siunnersuutip matuma assinga UKA 13-imi suliaraa. Taamani Aningaasaqarnermut Akileraartarnermullu Ataatsimiititaliaasup immikkoortup akuersissutigineqarnissaa inassutigaa. Tamanna tunngavigalugu 2014-imi upernaakkut suliarineqartussanngorlugu allannguutissatut siunnersuut Naalakkersuisunit suliarineqarpoq. Allannguutissatut siunnersuutip imarai atuuttuulersitsinissamut aalajangersakkat allanngortinneqarnissaanik siunnersuut aammalu pigisat tigussasut Aatsitassarsiornermi Aningaasaateqarfimmit isertitarineqartunut ilanngullugit naatsorsorneqartannginnissaanik siunnersuut. Allannguutissatut siunnersuut 2014-imi upernaakkut ataatsimiinnermi siullermeerneqarpoq aammalu aappassaaneerneqarnissaa pingajussaaneerneqarnissaalu 2014-imi ukiakkut ataatsimiinnissamut kinguartinneqarlutik. Siunnersuutip upernaakkut 2014-imi siullermeerneqarnerani siunnersuut itigartinneqassasoq Inatsisartunit amerlanerussuteqartut inassutigaat. Qinersinissap nalunaarutigineqarnera pissutigalugu siunnersuut atorunnaarpoq.

Ajornartorsiutip tamatuma qanoq paasineqarnissaa ersarissisillugu nassuiaanissaq pingaaruteqarluinnartoq Aningaasaqarnermut Akileraartarnermullu Ataatsimiititaliaq isumaqarpoq. Taamaattumik suliap ingerlanneqarnissaani isertitarisassanut siunissami piumasaqaatit suut Aatsitassarsiornermi Aningaasaateqarfimmut atuutissanersut isumaliutigeqqissaaqqullugit Naalakkersuisut ataatsimiititaliamit kaammattorneqarput. Isertitat aningaasaanngitsut pissutigalugit Aatsitassarsiornermi Aningaasaateqarfiup aallartinneqarnissaa naapertuutinngitsutut Inuussutissarsiornermut Ataatsimiititaliamit taamatullu Aningaasaqarnermut Akileraartarnermullu Ataatsimiititaliamit oqaatigineqartarsimavoq.

Aatsitassarsiornermi Aningaasaateqarfeqassanersoq imaluunniit taamaattoqassannginnersoq, tamatumanilu piumasaqaatit aningaasaateqarfiup aallartinneqarnissaanut aqunneqarnissaanullu atuuttussat aaljangiiffiginissaat, Kalaallit Nunaata nammineq aalajangigassarimmagu erseqqissassallugu naleqquttoq Aningaasaqarnermut Akileraartarnermullu Ataatsimiititaliaq isumaqarpoq. Aatsitassarsiornermi Aningaasaateqarfimmi isertitarisassanut piumasaqaatit pillugit Naalakkersuisut isumaliutiginninnissaminni tamanna pillugu Inatsisartut piffissap ingerlanerani naalakkersuinikkut isummiussimasaanik unneqqarissumik aamma ilanngussinissaat ataatsimiititaliamit naatsorsuutigineqarpoq.

3. Siunnersuutit aningaasaqarnikkut kingunerisassaat

Siunnersuutit aningaasaqarnikkut kingunerisassaattut siunnersuuteqartup aalajangiiffigisasatut siunnersuutimini nassuiaatigisaanit allaanerusumik naliliinissamut ataatsimiititaliaq tunngavissaqarsorinngilaq.

4. Ataatsimiititaliap inassuteqaatai

4.1 (UKA 2015/120)

Tamanna tunngavigalugu siunnersuut Inatsisartunit akuerineqassasoq **Aningaasaqarnermut Akileraartarnermullu Ataatsimiititaliami amerlanerussuteqartut Inuit Ataqatigiit Demokraatillu ilaasortaataasa inassutigaat.**

Tamanna tunngavigalugu Aningaasaqarnermut Akileraartarnermullu Ataatsimiititaliami ikinnerussuteqartut Siumup Atassutillu ilaasortaataasa inassutigaat siunnersuut Inatsisartunit itigartitsissutigineqassasoq.

4.2 (UKA 2015/121)


Tamanna tunngavigalugu siunnersuutip Inatsisartunit akuerineqarnissaa **Akileraartarnermut Akitsuusiisarnermullu Ataatsimiititaliap isumaqatigiittup inassutigaa.**

4.3 (UKA 2015/122)

Tamanna tunngavigalugu siunnersuut Inatsisartunit akuerineqassasoq **Aningaasaqarnermut Akileraartarnermullu Ataatsimiititaliami amerlanerussuteqartut Inuit Ataqatigiit Demokraatillu ilaasortaataasa inassutigaat.**

Tamanna tunngavigalugu Aningaasaqarnermut Akileraartarnermullu Ataatsimiititaliami ikinnerussuteqartut Siumup Atassutillu ilaasortaataasa inassutigaat siunnersuut Inatsisartunit itigartitsissutigineqassasoq.


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuutit aappassaaniigassanngortippai



Jens Immanuel,
siulittaasoq



Steen Lynge




Jess Svane



Tillie Martinussen



Naaja Nathanielsen



Sara Olsvig



Peter Olsen